

## 06.凍霜的三叔公仔

改編：葉淑華

各位評判老師，各位同學 逐家好！

「十二月天暎厝頂——凍霜」，是一句真趣味的「謔 kiat4 仔話」，這句話是摳洗一个人真凍霜真意思。今仔，我就來講這個笑諷的故事來予逐家聽。

古早以前有一个好額人，逐家攏叫伊三叔公仔。三叔公仔雖然是有錢矣，毋過，伊一个錢拍二十四個結，甘願做錢奴才。若愛伊請客，除非是「天落紅雨，馬發角」愛伊開錢，就干那欲愛伊的命全款。伊若是開（𠵼𠵼）一仙錢，一定也想辦法趁二仙倒轉來，凍霜甲一工干旦甘食兩頓爾爾，甚至定定食清糜無配菜。

有一日，莊尾的阿水孀仔欲娶新婦，三叔公仔收到喜帖，想到愛包紅包，歸个人著召鬱卒起來，真無奈，共帖仔抽出來看覓咧，日子是—「四月初一……」。到了喜宴的前二工，三叔公就開始餓（go7）腹肚，干焦咁茶過頓爾爾，伊拍算欲共包予阿水孀的紅包，連本帶利食倒轉來。

四月初一彼工，三叔公趕來到阿水孀 佢兜的門口埕，咦！哪會沒辦桌？三叔公共帖仔閣抽出來看，啊呀！日子看毋對啦！應該是四月初二才對，但是已經忍耐二工了，歸氣啊！閣擋一工，時到通食到本的。

隔工暗頓，三叔公雄雄狂狂，攏趕來到阿水孀 佢兜的門口埕，唉！哪會全款也是無半个人客咧？三叔公仔趕緊共帖仔規張抽出來看一个較詳細咧！啥！是四月初三才對喔！進前帖仔無歸張攏抽出來，只干焦看到頭前彼二橫爾。三叔公仔連繼餓（go7）三工，腹肚已經餓甲擋袂牢了！只好轉去厝叫佢兜的查某嫻阿花仔，去 Sa7 一粒卵予伊食，三叔公仔想講若是共卵歸粒哺予爛，就會消化傷過緊，時到就會食較少，所以伊就共卵殼剝掉，規粒卵用吞的，哪知影！雄雄吞傷緊，彼粒卵煞梗佇咽喉--裡，就按無氣，一命嗚呼哀哉！

三叔公 佢 兜的人趕緊去買一副棺材，共伊入棺蓋蓋封釘。可能是釘仔釘傷大下，梗佇三叔公仔咽喉彼粒卵煞落下來，三叔公雄雄精神起來，毋知家已已經倒佇棺材底矣，聽到錠釘仔聲，掠準講是有人來弄門，就大聲喝講：「阿花仔！較緊去開門啦！有人欲來請我去阿水孀 佢兜食桌了！」我的故事就講到遮，感謝逐家！